

Dragi prijatelji/ce,

Predstavljamo vam **novembarsko** izdanje mjesečnog informativnog Biltena Omladinskog resursnog centra (ORC) Tuzla i Omladinske mreže Bosne i Hercegovine, koja za sada broji **186** organizacija i **115** pojedinaca iz **75** mjesta BiH.

Bilten trenutno izlazi na bosanskom-srpskom-hrvatskom i engleskom jeziku.

Bilten sadrži informacije o radu Omladinskog resursnog centra (ORC-a) Tuzla, mjesečne aktivnosti omladinskih organizacija, neformalnih grupa i pojedinaca - članova Omladinske mreže Bosne i Hercegovine, njihove planove za naredni period i ostale korisne obavijesti namijenjene mladima i NVO sektoru (donatorski pozivi za projekte, konferencije, seminare, školarine, stipendije i sl.).

Ukoliko želite da budete na mailing listi za naredna izdanja mjesečnog informativnog Biltena, ili ako imate pitanja ili sugestije, javite nam se. Mjesečni informativni Bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

www.omladina-bih.net



SADRŽAJ

Aktivnosti u novembru 2018.	2
Planovi za decembar 2018.	6
Mladi pišu.....	7
Aktivnosti članova mreže.....	8
Saopštenja/informacije/donatori/pozivi	18

Uživajte u čitanju!

AKTIVNOSTI ORC/HCA U NOVEMBRU 2018.

CAT – GRAĐANI PROTIV TERORIZMA

Tokom mjeseca novembra nastavili smo sa našim redovnim aktivnostima u sklopu projekta „Građani protiv terorizma – CAT“. Naše mačke su nastavile da oduševljavaju javnost na društvenim mrežama, a od ovog mjeseca našem timu mladih su se pridružili i predstavnici medijske kuće „Fabrika“. Ukoliko još uvijek ne pratite naše mačke – pozivamo vas da to učinite na: www.facebook.com/CATBiH



Frontal Blog Challenge obuka – Kozara



Na Kozari je u periodu od 02. do 04. novembra održan prvi modul #FrontalBlogChallenge-a, na kojem je učešće uzela članica ORC-a Tuzla Mirela Biković.

Svi učesnici su tokom tri dana imali priliku da kroz interaktivne radionice i predavanja nauče više o korištenju interneta u svrhe promocije i povećanja vidljivosti društveno-odgovornih projekata.

Šta je „kvalitet“ u online svijetu, koje su osnove kontent marketinga, kako profitirati od bloga, samo su neke od tema koje su učesnici Frontal Blog Challenge obuke obrađivali, sa predavačima koji su vodeći u digitalnom svijetu, Draganom Varagićem, internet strategom i jednim od vodećih regionalnih stručnjaka u svijetu internet savjetovanja i Ivanom Ćirković, konsultant za internet marketing.

Prvi modul obuke za blogere završio je uz razgovor sa blogerima Srđanom Puhalom i Denisom Čarkadžićem.

Lisbon Forum 2018



U glavnom gradu Portugala, Lisabonu, od 14. do 16. novembra održan je Lisbon Forum 2018, na temu „Mladi, Mir i Sigurnost“.

Forum je organizovan od strane North-South Centre of the Council of Europe, a sudionici su se borili za pronalaženje boljih odgovora na snove i težnje mladih u Euro-Mediterranskoj regiji. Zaključak svih je bio isti, a to je da mladima treba dati priliku da pokažu šta znaju! Forum je završio tako što su zadnji dan svi sudionici zapjevali pjesmu mira, koju je napisao upravo jedan od mladih učesnika Foruma, inspirisan raznim događanjima koja su

zadesila Euro-Mediterransku regiju u posljednje vrijeme. Učešće na Forumu su uzeli mnogobrojni ambasadori, ministri, nevladini aktivisti, mladi, a naša predstavnica, ujedno i najmađa učesnica Foruma bila je Mirela Biković.



„OTPORNOST ZAPADNOG BALKANA“

U Budvi je 15. i 16. novembra organizovana konferencija pod nazivom „Otpornost država Zapadnog Balkana – Saradnički pristupi suočavanja ekstremizmu kroz akciju!“.

Konferenciji su prisustvovali predstavnici šest država Zapadnog Balkana iz Ministarstava sigurnosti i Unutrašnjih poslova, nezavisni istraživači i profesori, ali i sve organizacije civilnog društva koje se bave prevencijom radikalizma koji vodi ka nasilnom ekstremizmu i terorizmu.



Konferencija je organizovana od strane Međunarodnog Republikanskog Instituta „IRI“, a naš predstavnik na njoj je bio Slobodan Blagovčanin.

Omladinska grupa ORC Tuzla

Jednakost bez granica

09. novembra je u prostorijama Mješovite srednje mašinske škole Tuzla održana radionica na temu “Jednakost bez granica”.

Radionicu su održali članovi i predstavnici Informativnog centra za osobe sa invaliditetom Lotos Tuzla.

Gosti su ovom radionicom imali za cilj da unaprijede i podignu svijest za ravnopravnost uživanja svih ljudskih prava i osnovnih sloboda osoba sa invaliditetom.

Na radionici su prisustvovali učenici i profesori, a također i dva člana Omladinske grupe ORC-a, koji su učenici navedene škole, a to su: Burek Benjamin i Džananović Amina.



Dan srednjoškolaca



Na Trgu slobode u Tuzli je, 16. Novembra, održana aktivnost povodom obilježavanja Dana srednjoškolaca. Aktivnost je održana od strane Mreže vijeća učenika Tuzlanskog kantona, a na njoj su prisustvovali članovi Vijeća učenika srednjih škola sa područja TK i neke nevladine organizacije.

Glavni cilj aktivnosti je bio podsjetiti na spomen na praške studente i srednjoškolce koji su zbog mirnog prosvjeda protiv nacističke okupacije svoje zemlje 1939. godine strijeljani bez suđenja. Kao predstavnici svog Vijeća učenika, tako i omladinske grupe ORC Tuzla bili Benjamin Burek i Amina Džananović.

Promocija građanskog aktivizma kroz odgovoran odnos prema okruženju



13. novembra je u Ateljeu Ismeta Mujezinovića održan okrugli stol na temu "Promocija građanskog aktivizma kroz odgovoran odnos prema okruženju".

Okruglom stolu su prisustvovali predstavnici Policije i Gradske službe za komunalne djelatnosti gdje su govorili o mehanizmima koji postoje i adekvatnim reakcijama građana u slučaju incidenta počinjenih iz mržnje, vandalizma i drugih oblika narušavanja pozitivne atmosfere, a također su promovisane i neke do sada sprovedene društvene akcije, tj. aktivnosti Koalicije i njenih članica.

Pored predstavnika policije i Gradske službe za komunalne djelatnosti bile su prisutne i druge nevladine organizacije.

Okruglom stolu su prisustvovali naši članovi: Benjamin Burek i Amina Džananović

Naš grad, naš prostor

Omladinski pokret "Revolt" organizovao je interaktivnu radionicu u petak (23.11.) i subotu (24.11.) pod nazivom "Naš grad, naš prostor."

Učesnice i učesnici su imali priliku da se upoznaju sa aspektima aktivizma u javnim prostorima i u preuređenju javnih prostora, razmijene iskustva sa učesnicama i učesnicima iz cijele Bosne i Hercegovine, ali i da u okviru zajedničkog rada praktično nauče i ovladaju tehnikom izrade stencila i primjene istih u planiranju lokalnih akcija u svojim zajednicama.

U okviru programa održala se projekcija filma "Exit Through the Gift Shop."



Na radionici je uzeo učešće i Benjamin Burek - član Omladinskog resursnog centra Tuzla.

Saradnja građana i vlasti

U Brčkom je 27.novembra, u prostorijama Gradske vijećnice od strane CPCD-a (Centar za promociju civilnog društva) održan drugi jednodnevni trening na temu "Saradnja građana i vlasti".

Prezentacije i vježbe kroz koje su učesnici prešli:

- Društveno učešće
- Procjena stava
- Potrebe i vidovi saradnje građana i lokalne vlasti
- Liderstvo u zajednici: Uloga lidera i građanina
- Prijedlozi za razvoj odgovornog lidera i građanina u zajednici
- Akcije u zajednici: Promjena u zajednici

- Akcije u zajednici: Pet građanskih akcija



Na na treningu su učestvovali predstavnici iz vladinog i nevladinog sektora. Ispred Omladinskog resursnog centra Tuzla učešće na treningu uzeo je Benjamin Burek.

REDOVNE AKTIVNOSTI ORC I HCA TUZLA

Tokom novembra radili smo na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net). U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH. Vršili smo korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH. Isto tako, naš projektni tim nastavio je sa apliciranjima za projekte.

PLANOVI HCA/ORC-A ZA DECEMBAR 2018.

- Nastavak implementacije projekta „CAT 18“. U okviru ovog projekta u naredom periodu naše aktivnosti su nastavak online treninga i mentorstva, te radovi na vizuelnom dizajnu stranica.
- Nastavak rada na projektnim aktivnostima projekta Profesionalna orijentacija kroz Pasoš kompetencija podržanog od strane Ambasade SAD u Sarajevu.
- Aktivnosti omladinske grupe ORC-a Tuzla
- Završetak izvještaja i pripreme za aktivnosti u 2019. godini



MLADI PIŠU:



Autor: Mirela Biković

#Frontal Blog Challenge

Šokantno: Kockar ruši sve rekorde čitanosti!?

Svi smo zajedno svjedoci količini medijske prašine koja se posljednjih dana podigla oko novopečene „rijaliti“ zvijezde, pjevačice, a sada već i spisateljice i njene već svima poznate knjige „Moj potpis“ , Kristine KIJE Kockar.

-Ako se poslužimo našim najboljim prijateljem, kojem se najčešće obraćamo u nevolji, a zove se google te ukucamo:

1. „Moj potpis“ Kockar. Gle čuda, dobit ćemo kao rezultat na hiljade objava od strane domaćih i stranih portala na tu temu: koliko je prodato knjiga, koja je cijena, koliko sati u redu biste morali čekati da biste došli do njenog potpisa, ekskluzivni djelovi iz knjige i sl.
2. Idemo sada malo dublje, ukucati ćemo: Dostojevski „Kockar“. Zamislite - nijedan domaći medij nije podržao, prenio, niti napisao članak na temu Dostojevskom, sve što ćete dobiti guglanjem ovog velikog pisca jeste: prepričana lektira, prepričana lektira i još malo, sada ćete se baš iznenaditi: prepričane lektire.
3. Nakon što smo išli dublje, sada idemo na najvećeg ovisnika, koji se zove „kockar“. Da, ako ukucate samo „kockar“, Kija je ponovo u vođstvu na listi pretraživanja našeg prijatelja googla. Znamo li da je kocka zapravo, epidemija koja sve više hara, te ovisnost koja svakim danom postaje sve rasprostranjenija, složenija i opasnija.



Možda se sada već pitate, ako već volim toliko „pametovati“ o tome kakva smo nacija, zašto onda i sama nisam prvo „guglala“ ovisnost o kocki, pa zatim Dostojevskog, pa tek posljednju gospođicu Kockar? Odgovor je vrlo jednostavan, koliko bi vas onda ušlo da pročita ovaj članak? Da, nažalost, mnogo manje...

Jedno imajte na umu, mediji i portali vam plasiraju sadržaj koji vi želite, koji pratite, te vas shodno tome i interesuje. Kockar tim istim portalima donosi mnogo više čitanosti, pregleda, share-ova, samim time i zarade od „Kockar-a“ i kockara.

Ako stvari pogledamo iz ove percepcije možemo zaključiti da je moć u vašim rukama i više nego što mislite, iskoristite je!

AKTIVNOSTI ČLANICA OMLADINSKE MREŽE BiH



Asocijacija srednjoškolaca u Bosni i Hercegovini”

Ul. Mula Mustafe Bašeskije 7, 71000 Sarajevo

Tel/fax: +387 33 205 850

E-mail: asubih@yahoo.com

Web: www.asubih.ba

Bio nam je divan dan, našem AsuBiH rođendan!



11 godina nismo tihi, slogan je obilježavanja jedanaestog rođendana Asocijacije srednjoškolaca u Bosni i Hercegovini.

ASuBiH je osnovana 04.11.2007. godine na Osnivačkoj generalnoj skupštini u Sarajevu, podrškom preko 250 srednjoškolaca, predstavnika svojih lokalnih zajednica iz cijele Bosne i Hercegovine. Inicijativu za osnivanje ove organizacije, pored samih srednjoškolaca, pokrenula je njemačka fondacija Schuler Helfen Leben (SHL) koja je i generalni donator ASuBiH-a.

Srednjoškolci iz 48 lokalnih zajednica širom Bosne i hercegovine obilježili su 11 godina postojanja organizacije kroz različite aktivnosti.

Glavna aktivnost sastojala se od simboličnog flash moba, gdje su srednjoškolci predstavili 11 uslova koji se moraju ispuniti kako bi ostali u Bosni i Hercegovini.

Uslovi:

Moderno i kvalitetno obrazovanje

Rad na istraživanjima i naučnim radovima

Opremljene učionice

Praktična nastava u preduzećima

Ukidanje segregacije u obrazovanju

Korištenje savremene literature

Inkluzija u nastavnom procesu za svakog srednjoškcolca jednako

Više literature u školskim bibliotekama

Poboljšanje pedagoških metoda nastavnog kadra

Jedinstven obrazovni sistem za sve srednjoškcolce

Škole snose troškove obrazovanja

Flash mob – Noseći 11 plakata na kojima su bili ispisani uslovi, srednjoškolci su na najprometnijim gradskim mjestima poručili kako žele izmjene u obrazovnom sistemu. Simbolični flash mobovi širom BiH su poslali snažnu poruku.

Pored toga, neki od timova održali su prezentacije u srednjim školama gdje su prezentovali rad ASuBiH-a.

Srednjoškolci su poručili da je ovo obilježavanje nastavak borbe srednjoškolaca ujedinjenih zajedničkim ciljevima, za bolje uvjete u obrazovanju i za ispunjavanje svih prava srednjoškolaca!

17. Novembar – Međunarodni dan srednjoškolaca: „Vi nas dijelite u obrazovanju, a van granica nas NE dijele“.



Asocijacija srednjoškolaca u Bosni i Hercegovini je ove godine u 50 lokalnih zajednica širom Bosne i Hercegovine, deveti put za redom, obilježila 17.11. – Međunarodni dan srednjoškolaca.

Ovaj dan se obilježava u znak sjećanja na studentske proteste koji su održani u Pragu 17.11.1939. godine gdje su studenti protestovali protiv nacističke okupacije, te su streljani bez prethodnog suđenja.

17.11. Međunarodni dan srednjoškolaca je dan kada srednjoškolci cijelog svijeta stavljaju fokus javnosti na svoje probleme.

Ove godine Asocijacija srednjoškolaca u Bosni i Hercegovini je fokus stavila na odlazak mladih iz BiH i segregaciju u obrazovanju, te je u skladu s tim ovogodišnji slogan obilježavanja: “Vi nas dijelite u obrazovanju, a van granica nas ne dijele.”

Ovogodišnje obilježavanje vezano je za ukupno 2 problema koje su delegati XI Generalne skupštine održane 12.-14.2018. godine prepoznali kao veoma važne za poboljšanje statusa srednjoškolaca:

Diskriminacija i segregacija u obrazovanju (fenomen „Dvije škole pod jednim krovom“) Odlazak mladih iz Bosne i Hercegovine

Ove godine su srednjoškolci iz 50 lokalnih zajednica, na prethodno navedene probleme djelovali kroz panel diskusije (14 zajednica) i ulične flash mob akcije (37 zajednica), te tako stavili probleme srednjoškolaca u javni diskurs i dali do znanja nadležnim institucijama da je vrijeme da se počne raditi na rješavanju problema koji se tiču srednjoškolaca.

Kroz pomenute aktivnosti, srednjoškolci su nastojali promovisati aktivnost srednjoškolaca u borbi za rješavanje problema diskriminacije i segregacije kao krucijalnu vrijednost izgradnje i poboljšanja odnosa među akterima vlasti i srednjoškolcima, te promovisali važnost ostanka mladih u Bosni i Hercegovini.

Koordinatorica ovogodišnjeg obilježavanja Međunarodnog dana srednjoškolaca, ispred Upravnog odbora, bila je Una Karabeg: “17.11. je najvažniji dan za nas srednjoškolce, kako u BiH, tako i širom Evrope. Na ovaj dan smo u fokus stavili probleme koje nas muče – segregaciju u obrazovanju i odlazak mladih iz BiH, te na taj način u 50 zajednica pokazali građanima da se za svoja prava borimo čak i subotom, te vlastima pokazali da smo itekako spremni za promjene, koje ako vlasti neće napraviti, mi hoćemo!”

Azra Sorguč, koordinatorica lokalnog tima Visoko, kazala je: “Srednjoškolci su na svoj dan, 17.11. pokazali ko su! Još jednom smo pokazali da smo jedno, širom Bosne i Hercegovine, ne gledajući koje smo vjere i



nacije. Uspjeli smo glasno i jasno prenijeti poruke: Ne želimo podjele! Ne želimo diskriminaciju! Ne želimo otići ali treba nam razlog da ostanemo! Iznova pokazujemo koliko smo ujedinjeni, prvo srednjoškolci pa onda aktivisti i porodica koja jeste ASuBiH. Srednjoškolci su sposobni za nevjerovatne stvari, ali nije dovoljna samo želja, već i rad ka željenom cilju, jer svaki uspjeh počinje s odlukom da ćemo pokušati. Ovaj dan obilježavamo u znak sjećanja na studentske proteste koji su održani u Pragu 17.11.1939. godine gdje su studenti protestovali protiv nacističke okupacije, te su streljani bez prethodnog suđenja. Kroz panel diskusije i mirne šetnje uspjeli smo ostaviti trag, ali će naša borba u budućnosti biti još jača. Neka nam predrasude ne sude! "Uvijek se čini nemogućim dok se ne uradi." (Nelson Mandela)

Zaista smo ponosni što su srednjoškolci iznova dokazali svoju želju i borbu za stvaranjem bolje i perspektivnije jedine nam domovine.

Grupa volontera u Asocijaciji srednjoškolaca u BiH

Obzirom na izuzetno brzu smjenu generacija Upravnog odbora, prvenstveno predsjednika, kao i činjenicu da se u 11 godina postojanja organizacije nije desilo da jedna generacija mandat sprovede do kraja sa istim brojem ljudi kako je i započela, Upravni odbor ASuBiH-a generacije 2017/2018. na sastanku u junu ove godine razradio je koncept volontera pomoću kojeg će olakšati narednim generacijama rad i pomoći pri realizaciji aktivnosti.

Struktura organizacije

Hijerarhija članstva naše organizacije na prvom mjestu podrazumijeva Generalnu skupštinu koja se sastaje jednom godišnje i predstavlja sve članove ASuBiH-a. Predsjednik i članovi Upravnog odbora rukovode organizacijom na mandat u trajanju od dvije (Upravni odbor) i jedne godine (predsjednik udruženja). Članstvo se u ovom slučaju bazira na lokalne timove kojih trenutno ima 63 na čelu sa koordinatorima lokalnih timova koji predstavljaju ključnu tačku komunikacije između Upravnog odbora i članova lokalnih timova.

Šta je Grupa volontera?

Termin "volonteri" u ovom slučaju predstavlja grupu ljudi koji su na hijerarhijskoj ljestvici članstva iznad koordinatora timova, ali ispod članova Upravnog odbora. Glavna uloga volontera jeste pomoć Upravnom odboru pri realizaciji projektnih aktivnosti i sprovođenje istih. Ovu grupu će činiti najaktivniji članovi organizacije, te oni članovi koji imaju želju kandidovati se za Upravni odbor ili predsjednika organizacije. Na ovaj način imali bi bolji uvid u količinu posla jednog člana UO/predsjednika nakon čega bi zaista mogli odlučiti da li žele/mogu biti članovi UO/predsjednik.

Realizacije ove ideje započela je predstavljanjem ovog koncepta Generalnoj skupštini 2018.godine.

Doprinos Grupe volontera radu ASuBiH-a

Smatramo da uvođenjem nove strukture pod nazivom „Grupa volonera“ unosimo novu atmosferu u rad organizacije.

Jedanaest aktivnih ljudi imat će priliku direktno se upoznati sa radom Upravnog odbora, te svojim idejama i znanjem pomoći u razvijanju svake od funkcija u Upravnom odboru.

Council Meeting SAME

U periodu 23.-25.11. članovi Upravnog odbora Asocijacije srednjoškolaca u BiH, Una Karabeg i Luka Ramljak, prezentovali su rad ASuBiH-a na Council Meetingu SAME-a u Lübecku, i postali članovi Vijeća ove evropske organizacije!

Solitarity Action Day Movement in Europe (SAME) okuplja sve organizacije koje realizuju socijalni dan u svojim državama, a mi smo sa pozicije članstva ušli i u vijeće!



OMLADINSKA ORGANIZACIJA "SVITAC"

Ul. Jusufa Čampare bb, 76100 Brčko Distrikt BiH

Tel./Fax: +387 49 211 032

E-mail: svitac@gmail.net

Web: www.svitac.org

FB: www.facebook.com/omladinska.svitac

Dnevne radionice

Omladinska organizacija Svitać je u novembru nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 14:00-15:30 časova. Mlađi učesnici su kreirali edukativne stvari uz pomoć lokalnih i međunarodnih volontera: medo, žaba i patka, prvo upoznavanje sa geometrijskim oblicima, te ćirilčna slova. I ovaj su mjesec nastavili sa tematskim radionicama na temu domaće životinje i zaštita prirodne sredine. Na muzičkim radionicama su učili i vježbali pjesmicu „Vuče, vuče bubo lenja“.

Materijal korišten na radionicama je karton u boji, kolaž papir, drvene i masne bojice, makaze, ljepilo, šljokice, drveni štapići, dekorativni i ukrasni papir, stickeri, radni listovi plastelin, vuna. Drugi dio radionice je namijenjen za relaksaciju, osvježanje, jogu, sportske i razne takmičarske igre. Cilj ovih aktivnosti kao i do sada je da djeca razviju maštu i da koristeći razne materijale izraze svoju kreativnost, te da razviju motoriku, osjećaj tolerancije i poštovanje prema drugima i usvoje lijepo ponašanje.

Učesnici druge radionice (14:00-15:30), za uzrast 8+, su vrijedno učestvovali u raznim aktivnostima. Ponedjeljom je kreativno izražavanje na kojima su učesnici i ovaj mjesec pravili kreacije koristeći razne materijale. Utorkom su učesnici vježbali engleski jezik i svakodnevnu komunikaciju, učili i ponavljali riječi za dijelove tijela i vrste voća, te razne igre koje poboljšavaju učenje engleskog u grupi i timski rad. Pored ovih aktivnosti, učesnici su i ovog mjeseca na muzičkim radionicama radili sa boomwhakersim-a i vježbali različite ritmove. Srijedom su održane radionice turskog jezika sa osnovama za upoznavanje. Četvrtkom su se družili uz sportske aktivnosti i teambuilding igre, gdje su igrali razne timske igre, a petkom su nastavili raditi na radionicama njemačkog jezika (interkulturalna razmjena Njemačka / Bosna i Hercegovina). Cilj i ovih aktivnosti je da učesnici razviju maštu i da koristeći razne materijale izraze svoju kreativnost, razviju motoriku, osjećaj tolerancije, poštovanje prema drugima i usvoje lijepo ponašanje. Koordinator radionica u novembru je bio Adin Midžić uz asistenciju lokalnih, Weltwärts, Erasmus+ i „Love Volunteers“ međunarodnih volontera. Sve aktivnosti se održavaju u Omladinskom centru Brčko distrikta.

Radionica gitare

Učesnici radionice gitare su počeli raditi na novim gitarskim duetima i etidama. Nastavljen je rad na razvijanju improvizacijskih sposobnosti uz upotrebu naučenih skala, modova, arpeđa i supstitucija na zadatu harmoniju.

Radionica sambe

Učesnici ove radionice su uvježbavali dvije kompozicije koje su nastale tokom prošlog mjeseca: „The Builder“ i „No-Go-Agogo“. Osim ovoga grupa je počela sa radom na još dvije nove kompozicije.

Halloween Party / Noć Vještica

Omladinska organizacija Svitać je, u prostorijama Omladinskog centra, organizovala Halloween Party za djecu i mlade sa područja Brčko distrikta. Prvi dio je bio namijenjen za uzrast 4-6 godina od 11-13 časova, kada su mališani imali priliku da učestvuju u raznim igrama, te da zajedno pogledaju crtane

filmove na temu „Noć vještica“. Nakon toga su imali zakusku, te se birao najbolje ručno rađen kostim uz nagradu.

Drugi dio Halloween zabave je održan od 18-20 časova za uzrast 8+. Uz pomoć međunarodnih i lokalnih volontera, organizovan je zanimljiv program, kada su posjetioci imali priliku da učestvuju na tri stanice sa igrama tipičnim za Halloween, kao što su hvatanje slatkiša u brašnu, skidanje keksa sa konopca, „Spider football“, te skriveni predmeti u dekorisanim kutijama. U završnom dijelu zabave se takođe birao najbolje ručno rađeni kostim uz nagradu, te je upriličena i zakuska sa slatkišima tipičnim za Halloween i face painting-om.

Dan borbe protiv fašizma

Povodom Međunarodnog dana borbe protiv fašizma i antisemitizma, 09. novembra Omladinska organizacija Svitac je organizovala nekoliko radionica za djecu i mlade iz Brčko distrikta, uključujući muzičku radionicu „Bella ciao“, na kojoj su mladi kreativni muzičari uradili obradu poznate pjesme „Bella ciao“ i filmsko veče sa diskusijom na temu fašizam i prisustvo fašizma u našoj svakodnevnicu. Cilj radionica je bio da se promoviše važnost svjetskog mira i kritičko mišljenje. Obradu pjesme možete pogledati ovdje: https://youtu.be/tplp_axF9RE



Međunarodni dan tolerancije (16.11.)

Povodom Međunarodnog dana tolerancije, Omladinska organizacija Svitac je organizovala kreativne radionice na kojima su učestvovala dvije grupe učesnika. Cilj radionica je bio da se promoviše važnost međuljudske tolerancije, te da se ljudi prihvataju kao individue, a ne pripadnici određenih grupa. Mladi učesnici su slušali čitanje priče, prilagođene njihovom uzrastu „Uredu je biti drugačiji“, te su pogledali crtane filmove na istu temu. Poslepodnevna grupa je učestvovala u diskusiji o predrasudama i kako prevazići iste, te su radili aktivnosti, koje pospješuju saradnju i timski rad. Radionice su održane u prostorijama Omladinskog centra Brčko distrikt BiH.

„Dijalog za budućnost“ (DFF)



Nakon uspješnog završetka istraživanja „Identifikacija ključnih lokalnih aktera/zainteresovanih strana“, u nastavku DFF projekta slijedi realizacija programa obuke CPCD-a koji se sastoji od 3 jednodnevna treninga o temama od značaja za ciljeve ovog projekta. Predstavnica Omladinske organizacije Svitac, Almira Čehić je učestvovala na treninzima koji su održani 24.09.2018. i 16.11.2018. na temu „Zagovaranje javnih politika na javnom nivou“. Treninzi se održavaju u okviru projekta „Dijalog za budućnost“ (DFF) koji zajednički implementiraju UNDP, UNICEF i UNESCO u partnerstvu sa Predsjedništvom Bosne i Hercegovine. U sprovođenju

aktivnosti na ovom projektu, Brčko distrikt BiH saraduje sa nevladinim organizacijama iz lokalne zajednice. Treninzi se održavaju u prostorijama Gradske vijećnice.

Univerzalni dan djeteta

Povodom „Univerzalnog dana djeteta“ 20. novembra Omladinska organizacija Svitac je organizovala kreativnu radionicu na kojoj je učestvovala grupa učesnika uzrasta 4-7 godina. Cilj radionice je bio da se promoviše važnost svjetskog univerzalnog dana djeteta, stabilnost i sigurnost. Na radionici je prisustvovalo 13 učesnika uzrasta 4-7 godina i metodički je prilagođena njihovom uzrastu.

Učesnici su uz pomoć međunarodnih i lokalnih volontera imali priliku kreirati svoj vlastiti grad, sa raznim kućicama, zgradama i u kojem bi oni uživali svoja dječija prava. Takođe su naučili šta znači pojam „Dječije pravo“. Radionica je održana u prostorijama Omladinskog centra Brčko distrikt BiH.



Youth Exchange and Study (YES) debata



Omladinska organizacija Svitac je, na poziv predstavnika YES (Youth Exchange and Study), učestvovala na debati povodom Dana zahvalnosti u Američkom kutku u Gradskoj biblioteci Brčko distrikt BiH. Pored međunarodnih volontera iz Omladinske organizacije Svitac, na debati, koja je održana na engleskom jeziku, učestvovali su i učenici iz JU Gimnazije, jezički smijer. Iako je aktivnost organizovana povodom Dana zahvalnosti, razgovaralo se i o toleranciji u našem društvu i svakodnevnicima.

Događaji poput današnje debate i kritičko mišljenje su važni za održavanje tolerancije među mladima u Brčko distriktu, te se nadamo da će ovakvih događaja biti više.

Za decembar se planira nastavak svih redovnih radionica Omladinske organizacije Svitac.



PRONI Centar za omladinski razvoj

Ul. Mehmedagića 24, 76100 Brčko distrikt BiH

Tel./Fax: +387 49 217 695

E-mail: pronibrco@teol.net

www.pronibrco.ba

OKORUZ 2018 – Mreža omladinskih klubova

U mjesecu novembru, 2018. godine, PRONI Centar za omladinski razvoj pokrenuo je novi projekt OKORUZ, namijenjen Mreži omladinskih klubova koja djeluje u 26 Mjesnih zajednica.

Program Mreža omladinskih klubova Brčko distrikta BiH je jedan od pozitivnih primjera rada sa mladima u BiH gdje se na najbolji mogući način ostvaruje suradnja Vladinog i NVO sektora po zajedničkim pitanjima od značaja za mlade Brčko distrikta BiH.

Mreže omladinskih klubova čini 26 omladinskih klubova u MZ-ma: Bijela, Brezovo Polje, Brka, Bukvik, Buzekara, Čande, Donji Brezik, Dubrave, Gluhakovac, Grbavica, Grčica, Gredice, Ivici, Maoča, Omerbegovača, Palanka, Potočari, Prijedor, Rašljani, Ražljevo, Skakava Gornja, Slijepčevići, Stari Rasadnik, Štrepci, Vitanovići i Vučilovac.

Na inicijativu PRONI Centra, i u suradnji sa MZ-ma i Vladom Brčko distrikta BiH u 2018 godini kroz projekat **Mreža omladinskih klubova i novi projekat OKORUZ-a** PRONI će vršiti Osiguranje kvaliteta omladinskog rada u zajednici (OKORUZ) te raditi procjenu rada omladinskih klubova na osnovu koje će se dati preporuke i savjeti za unapređenje rada.

Postoji mogućnost da se otvore novi Omladinski klubovi u novim mjesnim zajednicama kod kojih se pokazala potreba za istim.

Sa svih 52 volontera i volonterke se radilo na unaprijeđenju njihovih vještina za rad s mladima i djecom kroz PAOR – PRONI Akademiji omladinskog rada.

Napominjemo da od 2007 do danas PRONI svake godine radi na podršci Mreže omladinskih klubova kroz suradnju sa Pododjelom za podršku MZ, NVO i UG Vlade Brčko distrikta BiH, ali i drugim zainteresiranim stranama.

PRONI škola kratkog filma (17. – 18. Novembar 2018.)

U periodu od 17.- 18. novembra 2018. godine završena je aktivnost snimanja kratkometražnih filmova, u svrhu prevencije nasilja nad ženama i djevojkama. Ova aktivnost realizovala se u Brčkom, u okviru projekta „Orodnjavanje izgradnje mira na lokalnom nivou“, kojeg implementiraju „Forum žena“ Bratunac i „HO Horizonti“ Tuzla. Projekat je finansiran od Švedske fondacije „Kvinna till Kvinna“. Grupa mladih pod nazivom „Liga mladih pacifista“ učestvovala je u realizaciji ove aktivnosti.



PRONI Centar za omladinski razvoj, kao partner na ovom projektu, pružio je tehničku podršku u izradi kratkometražnih filmova.

Mladi iz Tuzle, Bratunca, Gračanice, Srebrenika, Milića i Vlasenice, uz pomoć trenera Stefana Savčića i Aleksandra Ganilovića, naučili su kako samostalno snimiti film. Kao polaznici Proni škole kratkog filma

prošli su obuku iz teorijskog i praktičnog djela. Bili su podijeljeni u pet timova: Scenaristi, režiseri, direktor fotografije/snimatelji, montažeri i glumačka postava. Na prijedlog učesnika postignut je zajednički dogovor da se dva finalna proizvoda, odnosno kratkometražna filma, spoje u jedan, zbog posebnog umjetničkog doživljaja. Svim polaznicima PRONI škole kratkog filma, koji su uspješno prošli obuku, podijeljeni su certifikati za učešće.

U svrhu prevencije nasilja nad ženama i djevojkama film će biti prikazan u okviru kampanje „16 dana aktivizma“.

Evropske integracije u Brčkom sufinansiraju projekat „Mladi protiv nasilnog ekstremizma“

Na temelju Zakona o javnoj upravi, Zakona o izvršenju Proračuna Brčko distrikta BiH za 2018. godinu, i Odluke usvajanju kriterija i proceduri za dodjelu dotacija za sufinansiranje projekata Evropske unije i drugih donatora, Odjel za evropske integracije i međunarodnu suradnju objavili su Javni poziv za dodjelu dotacija za sufinansiranje projekata Evropske unije i drugih donatora.

Svrha dodjele dotacija za sufinansiranje projekata jeste da se doprinese unapređenju pojedinih oblasti u Brčko distriktu Bosne i Hercegovine (u daljnjem tekstu: Distrikt), a posebice:

- a) procesa evropskih integracija i međunarodne suradnje
- b) ekonomskog razvoja
- c) društvenog razvoja
- d) razvoja civilnog društva
- e) borbe protiv korupcije
- f) jačanju kapaciteta institucija Distrikta
- g) odgovora na katastrofe i izvanredne situacije.

Projekat „Mladi protiv nasilnog ekstremizma“, koji sprovodi PRONI Centar za omladinski razvoj iz Brčkog podržan od Nizozemske ambasade u BiH kroz MATRA program prepoznat je kao kvalitetan projekat koji doprinosi mladima u Brčkom ali i čitavoj BiH. Projekat koji traje 2 godine dobio je grant sufinansiranja iz kancelarije za Evropske integracije u Brčkom u iznosu od 15000 kovertabilnih maraka.

Drago nam je da su vlasti prepoznale rad PRONI Centra za omladinski razvoj te da nastavljaju podržavati mlade i omladinske organizacije koje se bave mladima kao i podršku koju Nizozemska ambasada pruža kroz MATRA ali i kroz razne druge programe.

Više informacija o projektu: www.nenasilno.ba

Budva: Western Balkans Resilience Forum

PRONI Centar učestvovao je na **Wester Balkans Resilience Forum** konferenciji u **Budvi od 14-16.11.2018.**

Konferenciju su otvorili predstavnici američkog State Departmenta, koji su pozvali na zajedničko djelovanje država regiona u borbi protiv ekstremizma.

Forum o nacionalnim i lokalnim pristupima suprotstavljanja religijskom i etno-nacionalističkom ekstremizmu na Zapadnom Balkanu, okupio je ministre unutrašnjih poslova regije, kao i sve druge organizacije koje se bave pitanjima sigurnosti i prevencije nasilnog esktremizma.

Konferenciju su otvorili predstavnici američkog State Departmenta, koji su pozvali na zajedničko djelovanje država regiona u borbi protiv ekstremizma.

Pete Marocco, zamjenik pomoćnika državnog sekretara i šef Biroa operacija vezanih za sukobe i stabilizaciju u State Departmentu, kazao je da je radikalizacija zajednički neprijatelj svih i da zbog toga svi moraju da rade zajedno.



Christopher Harnisch, zamjenik koordinatora za borbu protiv nasilnog ekstremizam u State Departmentu, istakao je da je prijetnja terorizma postala opasnija i složenija nego ikada u istoriji.

Ministar sigurnosti Bosne i Hercegovine **Dragan Mektić** također je učestvovao na konferenciji u Budvi.

Učestvujući na panelu o sigurnosnim izazovima zemalja Zapadnog Balkana, ministar Mektić je istakao mjere koje BiH poduzima u ovoj oblasti, te naglasio važnost regionalne saradnje, razmjene informacija i iskustava u borbi protiv svih oblika ekstremizma i radikalnih grupa koje svojim djelovanjem narušavaju sigurnost cijelog regiona.

Omladinski rad u Jugoistočnoj Evropi (13. – 15. Novembar – Ljubljana, Slovenija)

Seminar vršnjačkog učenja o omladinskom radu i njegova povezanost sa omladinskom politikom u Jugoistočnoj Evropi

Trodnevni seminar u Ljubljani, u periodu od 13. do 15. Novembra, okupio je 40 učesnika sa područja Jugoistočne Evrope, takođe i nekoliko učesnika iz zemalja Evropske Unije sa razvijenom politikom o omladinskom radu.

Ispred PRONI Centra za omladinski razvoj učestvovao je omladinski radnik Stefan Savčić, koji je podijelio iskustva PRONI Centra za omladinski razvoj o radu sa mladima kroz Mrežu omladinskih klubova Brčko distrikta BiH, te najavio planove za otvaranje novih PRONI omladinskih klubova u Bijeljini, Banja Luci, Mostaru i Sarajevu.

Ciljevi seminara su bili:

- Unapređenje znanja vezanog za omladinski rad u Jugoistočnoj Evropi;
- Istraživanje o trenutnim preprekama i potrebama za jačanje omladinskog rada u Jugoistočnoj Evropi, te kako omladinskog politika može u tome da pomogne.
- Povećati saradnju omladinskih organizacija i bitnih aktera u regionu radi razvoja sektora omladinskog rada.
- Analizirati koju ulogu omladinski rad ima u podršci omladinske politike na različitim političkim nivoima.



„Budi muško“ klub – izrada murala u školi

PRONI Centar u saradnji sa [JU Tehnička škola Brčko](#) kroz projekat [Budi Muško Klub Brčko](#) organizovali su još jednu aktivnost - oslikavanje murala u prostorijama škole.



Murali su završeni, a zidovi škole su ukrašeni znanstvenicima, pronalazačima, piscima: Nikola Tesla, Desanka Maksimović, Tin Ujević, Isaac Singer, John McAdam, Musa Ćazim Ćatić, James Watt, Antonio Gaudi i Ruđer Bošković.

Budi Muško Klub organizovao je ove godine preko dvadeset edukativnih radionica radeći na prevenciji rodno zasnovanog nasilja kroz Program "Y".

Organizovali smo i putovanje u Etno Selo "Stanišići", prezentacije, kampanje i promocije.

Zahvaljujemo se menadžmentu JU Tehničke škole Brčko na otvorenoj saradnji i ukazanom povjerenju.

Projekat je podržan od [Perpetuum Mobile](#) i [CARE](#).

INFORMACIJE / DONATORI / POZIVI

Nagradni javni konkurs za dostavu idejnih prijedloga na temu: Spomenik na Kazanima



Udruženje za društvena istraživanja i komunikacije (UDIK) objavljuje Nagradni konkurs kojim će se afirmirati idejno rješenje trajnog spomenika žrtvama ubijenim na Kazanima, a obzirom da se radi o stradanju civila različite etničke pripadnosti, spomenik se može afirmirati i kao obilježje svim žrtvama rata u Bosni i Hercegovini.

Obzirom da je spomenik ubijenim civilima na Kazanima dug svih građana Sarajeva, a shodno tome da ne postoji spomenik svim stradalim civilima u Bosni i Hercegovini, odlučili smo se za jedan jedinstven spomenik koji će obilježiti sve civilne žrtve rata u našoj zemlji.

Konkurs je otvoren za učesnike/ce do 35. godine starosti, koji/e se bave profesionalno ili amaterski slikarstvom, skulpturom, grafikom, crtežom, pisanjem, fotografijom, instalacijom, videom, performansom, novim medijima i/ili imaju interdisciplinarni pristup.

Konkurs će biti otvoren do 28.2.2019. godine.

Objavlivač javnog konkursa zadržava pravo korištenja prispjelih radova za priređivanje u svojim budućim publikacijama, analima, web stranici i sl.

Radovi koji vrijeđaju na rasnoj, vjerskoj, etničkoj, spolnoj ili rodnoj osnovi neće biti razmatrani.

Propozicije:

1. Pravo učešća imaju autori/ce koji su svojim djelovanjem i stvaralaštvom vezani za prostor bivše SFRJ.
2. Autori/ce svoj nacrt idejnog rješenja za spomenik mogu dostaviti u obliku crteža, skice, priče, nacrta ili bilo koje druge forme kojom se izražavaju. Bez obzira na dostavljenu formu, svaki/a autor/ica uz idejni prijedlog treba dostaviti i kratak opis idejnog rješenja (do 500 karaktera).
3. Svaki konkursni paket treba sadržavati: autorsko djelo, kratak opis idejnog rješenja, biografiju i fotografiju kandidata.

Konkursnu dokumentaciju potrebno je poslati na adresu: UDIK, Grbavička 51, 71000 Sarajevo, BiH ili na e-mail: official.udik@outlook.com sa naznakom: Za konkurs „Spomenik na Kazanima“.

Pet najboljih rješenja biće uneseni kao idejni prijedlozi u okviru nove UDIK-ove publikacije, a prvoplasirano rješenje biće nagrađeno i robnom nagradom. Pobjednici idejnog rješenja biće objavljeni najkasnije do **4.3.2019. godine**.

Sve dalje informacije o konkursu, idejnim prijedlozima i pobjedničkoj nagradi biće dostupne na web stranicama www.memorijali.org i www.udik.org.

Igmanska inicijativa objavila poziv za prijedloge projekata organizacija civilnog društva

Igmanska inicijativa, mreža nevladinih organizacija civilnog društva iz Srbije, Bosne i Hercegovine, Crne Gore i Hrvatske, objavila je **konkurs za prijedloge projekata**. Program malih grantova se realizuje u okviru projekta “**CARE – doprinos pristupu izbjeglica i raseljenih osoba pravima i mogućnostima za zapošljavanje**”, koji finansira Evropska komisija, DG NEAR, sa osnovnim ciljem da se doprinese tehničkoj, socio-ekonomskoj i socio-kulturnoj održivosti [Regionalnog programa stambenog zbrinjavanja](#).

Projekti u okviru Programa malih grantova primjenjuju se u Bosni i Hercegovini, Hrvatskoj, Crnoj Gori i Srbiji. Ukupni budžet Programa iznosi 230,000 EUR. Trajanje projekata iz ovog poziva je od 6 do 12 mjeseci. Ovo je ograničen poziv za podnošenje prijedloga projekata, u kojem je prvi korak evaluacija kompletne prijave, koji uključuje Deklaraciju podnosioca prijedloga, dokumente koji se odnose na registraciju, i finansijske izvještaje za posljednje 2 godine, kako bi se utvrdila podobnost kandidata.

Rok za podnošenje kompletnih prijava je **15. decembar 2018.** Jezik poziva za projekte je engleski. Kandidati koji su prethodno odabrani podliježu detaljnoj provjeri podobnosti na osnovu priloženih dokumenata. Kriteriji, okvirni budžet, ciljna grupa i prioriteti su identifikovani u skladu sa potrebama korisnika RHP i navedeni su u smjernicama za svaku zemlju.

Svi dokumenti koji se odnose na ovaj poziv, kao i dodatne informacije su dostupne na [ovom linku](#).

Javni poziv za projekte saradnje 2019.

Otvoren je javni poziv za podnošenje projekata u okviru Evropskih projekata saradnje programa Kreativna Evropa. U okviru ovog poziva možete konkurisati u dvije kategorije:

- **Evropski projekti saradnje malog obima (kategorija 1):** minimum 3 partnerske organizacije (jedna iz EU), do 200.000€, što predstavlja 60% dozvoljenih troškova;
- **Evropski projekti saradnje velikog obima (kategorija 2):** minimum 6 partnerskih organizacija (jedna iz EU), do 2.000.000€, što predstavlja 50% dozvoljenih troškova;

U odnosu na dosadašnje pozive, ovogodišnji konkursni poziv se neznatno razlikuje u odnosu na standardni, jer su zadržani prioriteti koji su u vezi s obilježavanjem Evropske godine kulturnog naslijeđa (preciznije naznačeno u navođenju prioriteta u daljem tekstu).

Prilikom osmišljavanja projekata, projektnu ideju bi trebalo usmjeriti ka jednom od tri cilja konkursa:

- Jačanje kapaciteta evropskih kulturnih i kreativnih sektora da djeluju transnacionalno i na međunarodnom nivou, kao i promovisanje transnacionalne cirkulacije umjetničkih dela; **Transnacionalna mobilnost profesionalaca u kulturi, a naročito umjetnika;**
- **Doprinos razvoju publike** kroz osmišljavanje novih i inovativnih načina rada s publikom, kao i unaprijeđenje dostupnosti kulturnih programa i sadržaja, s posebnim fokusom na djecu, mlade ljude, osobe sa invaliditetom i marginalizovane grupe publike;
- **Doprinos inovacijama i kreativnosti** u oblasti kulture, kroz testiranje novih poslovnih modela i promociju novih utjecaja na druge sektore.

Kako bi se postigli navedeni ciljevi, konkursom su definisani sljedeći prioriteti:

- Promovisanje transnacionalne mobilnosti umjetnika i profesionalaca u cilju uspostavljanja saradnje na međunarodnom nivou i internacionalizacije njihovog rada;
- Rad na razvoju publike kao sredstvu za unaprijeđenje pristupa evropskim kulturnim i umjetničkim djelima, materijalnom i nematerijalnom kulturnom naslijeđu, kao i stvaranje mogućnosti za bolji pristup kulturnim djelima djeci, mladima, osobama sa invaliditetom i predstavnicima marginalizovanih i društveno osjetljivih grupa;
- Podrška izgradnji kapaciteta ustanova, organizacija i pojedinaca kroz inovativne pristupe stvaranju, razvoju i testiranju inovativnih modela prihodovanja, menadžmenta i marketinga u kulturnom sektoru, a naročito u pogledu korištenja digitalnih tehnologija i razvoju vještina profesionalaca u oblasti kulture za primjenu digitalnih alata;



– Unaprijeđenje interkulturalnog dijaloga, promovisanje zajedničkih vrijednosti evropskog kulturnog prostora i međusobnog razumijevanja; poštovanje drugih kultura, time doprinoseći društvenoj integraciji migranata i izbjeglica;

– Kao nastavak obilježavanja Evropske godine kulturnog nasleđa u 2018. godini, jedan od prioriteta ostaje podizanje svijesti o zajedničkoj istoriji i vrijednostima, kao i jačanje osjećaja pripadnosti zajedničkom evropskom prostoru.

Konkurs je otvoren do 11. decembra 2018. godine u podne po briselskom vremenu.

Priručnik za aplikante, sve potrebne uslove i dokumentaciju možete pregledati [ovdje](#).

Više informacija o pozivu možete pogledati na [sajtu Evropske komisije](#).

Ukoliko imate spremnu projektnu ideju, a u potrazi ste za partnerima, molimo vas da nam se obratite. Desk Kreativna Evropa BiH vam stoji na raspolaganju za tehničku pomoć pri konkurisanju.

Više informacija: <https://kreativnaevropa.ba/grant/javni-poziv-za-projekte-saradnje-2019>

INSPIRE fond – Fleksibilan mehanizam finansiranja

[The INSPIRE Working Group](#), neformalna mreža od oko 100 agencija posvećenih provedbi programa vezanih uz INSPIRE, pokrenula je poziv za podnošenje prijedloga projekata za podršku INSPIRE-ovim aktivnostima podizanja svijesti i angažmana u zemljama sa niskim i srednjim dohotkom. Finansiranje je omogućeno od strane [New Venture Fund](#) i [Ignite Philanthropy: Inspiring the End to Violence Against Girls and Boys](#).

Koje aktivnosti se finansiraju:

Do milijardu djece doživjelo je tjelesno, seksualno ili psihičko nasilje u posljednjih godinu dana. INSPIRE je tehnički paket za sve zainteresirane za spriječavanje i reagiranje nad nasiljem nad djecom i adolescentima – od vlade do lokalnih zajednica, od civilnog društva do privatnog sektora. Deset agencija sa dugom istorijom poticanja dosljednog pristupa zasnovanog na dokazima u spriječavanju nasilja nad djecom, sarađivale su u razvoju INSPIRE.

[INSPIRE paket](#) – sastavljen od osnovnog INSPIRE dokumenta i INSPIRE priručnika za implementaciju – uključuje sljedećih sedam strategija koje zajedno pružaju okvir za suzbijanje nasilja nad djecom:

1. Provedba zakona;
2. Norme i vrijednosti;
3. Sigurno okruženje;
4. Pomoć roditelja i skrbnika;
5. Prihodi i ekonomsko jačanje;
6. Usluge odgovora i podrške;
7. Obrazovanje i životne vještine (sigurne škole).

Osnovni INSPIRE dokument daje “šta” za svaku strategiju (npr. objektivne, potencijalne učinke i dokaz učinkovitosti), dok INSPIRE priručnik za implementaciju pruža “kako” (npr. teoriju promjene, najbolje prakse i troškove za svaku intervenciju). Radna grupa INSPIRE pruža forum na kojem vlade, bilateralna udruženja, organizacije civilnog društva, profesionalna udruženja, donatori i agencije UN-a koji mogu: 1) sarađivati na postizanju kolektivnih učinaka na globalnom i na nivou države; 2) dijeliti relevantne informacije na trajnoj osnovi; i 3) periodično preispitivati zajednički napredak u podržavanju provedbe INSPIRE-a.

Veličina donacije:

Veličina granta je između 5.000 i 30.000 dolara.

Rok za prijave:

Naredni rok prijava je 31. decembar/prosinac 2018. godine.

Geografsko područje podrške:

Prijaviti se mogu aplikanti iz više zemalja svijeta, uključujući i BiH.

Kriterij podobnosti:

Grantovi će se davati:

- Primarna publika: lokalne osobe, organizacije i konzorciji (na nacionalnom i regionalnom nivou) iz zemalja sa niskim i srednjim dohotkom (uključujući, ali ne ograničavajući se na članove radne grupe INSPIRE):
- Prioritet će se dati lokalnim nevladinim organizacijama / organizacijama civilnog društva (i lokalnim nevladinim udruženjima / konzorcijima koji vode organizacije civilnog društva), međutim, također primamo prijave drugih lokalnih agencija kao što su vladine i akademske institucije.
- Pojedinačni kandidati će se uzeti u obzir samo ako mogu demonstrirati prethodnu opsežnu tematsku i nacionalnu stručnost, pristup mrežama i postojeće odnose.
- Sekundarna publika: razmatraće se prijedlozi međunarodnih nevladinih organizacija (ili konzorcija koje vode međunarodne organizacije); međutim, trebaju jasno pokazati kako su predložene aktivnosti osmišljene sa lokalnim vlasništvom i kako će lokalni akteri imati direktne koristi.

Kako aplicirati:

Molimo vas da pogledate <http://www.cpcnetwork.org/inspirefund/> za više informacija.

Web stranica: <http://www.cpcnetwork.org/inspirefund/>

Konkurs SNAŽNIJE ZAJEDNO otvoren do 15. Decembra!

Trag fondacija, u partnerstvu sa **Oak fondacijom**, skoro četiri godine podržava ženske organizacije i ženski pokret u regionu zapadnog Balkana, u borbi protiv nasilja prema ženama. Kako smo uvjereni da su aktivistkinje koje se bore za ženska prava širom regiona najveće ekspertkinje u ovoj oblasti, odlučili smo da raspisemo konkurs u kome bismo baš njima dali glas da odlučuju koje inicijative treba da budu podržane.

Ovim pozivom **želimo da podržimo ženske kolektive u Srbiji, Bosni i Hercegovini i Crnoj Gori**, bilo da su neformalni ili udruženja, u ostvarivanju svojih ideja u oblastima borbe protiv porodičnog i partnerskog nasilja, trafikanga i eksploatacije, kao i izgradnje ženskog pokreta.

Odlučivanje o dodijeli donacija biće participativno, što podrazumijeva međusobno ocjenjivanje projektnih ideja od strane grupa i udruženja koja se prijave na konkurs. Vi ocjenjujete projektne ideje i na osnovu vaših ocjena će se donijeti odluka koje inicijative će biti podržane.

Trag će podržati najmanje 10, a najviše 15 inicijativa, u maksimalnom pojedinačnom iznosu do 10.000 dolara.

Popunjene prijavne formulare možete slati najkasnije **do 15. decembra** na e-mail adresu prijave@tragfondacija.org, sa naznakom **Za konkurs Snažnije zajedno**. Vaša grupa/organizacija može podnijeti samo jednu prijavu na konkurs. Prijavni formular možete preuzeti [OVDE](#).

Proces selekcije biće završen najkasnije do 15. februara 2019. godine.

U toku konkursa, ukoliko vam je potrebna bilo kakva podrška ili želite konsultacije u vezi sa vašom idejom, možete zakazati vaš termin za konsultacije putem e-mail adrese milena@tragfondacija.org.

Detaljnije informacije o uslovima konkursa i procesu odlučivanja možete preuzeti na slijedećem [LINKU](#).



Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30-ti u mjesecu.

Adrese za slanje vaših informacija za mjesečni bilten:
**Omladinski resursni centar
Tuzla**

**Hadži Bakirbega Tuzlića 1
75000 Tuzla
tel/fax: 035 258 077
e-mail: orctuzla@bih.net.ba
hcatuzla@bih.net.ba**

*Mjesečni bilten uređuje
Omladinski resursni centar -
ORC Tuzla*

*Prevod Biltena na engleski: **Emir
Karamujić***

*WEB stranica Mreže:
www.omladina-bih.net*

*Mejling lista Mreže:
posta@omladina-bih.net*

*Webmaster:
emir.delalic@gmail.com*